



中国经典名著

全宋词

(十一)

刘 丰 褚为良 編集

学苑音像出版社

目 录

张孝祥.....	员
李处全	源
丘 密	愿
吕胜己.....	员
赵长卿.....	员
廖行之.....	员
京 鏊.....	员

张孝祥

六州歌头

长淮望断，关塞莽然平。征尘暗，霜风劲，悄边声。黯销凝。追想当年事，殆天数，非人力，洙泗上，絃歌地，亦殫腥。隔水毡乡，落日牛羊下，区脱纵横。看名王宵猎，骑火一川明。笳鼓悲鸣。遣人惊。

念腰间箭，匣中剑，空埃蠹，竟何成。时易失，心徒壮，岁将零。渺神京。干羽方怀远，静烽燧，且休兵。冠盖使，纷驰骛，若为情。闻道中原遗老，常南望、羽葆霓旌。使行人到此，忠愤气填膺。有泪如倾。


水调歌头

为总得居士寿

隆中三顾客，圯上一编书。英雄当日感会，余事了寰区。千载神交二子，一笑眇然兹世。却愿驾柴车。长忆淮南岸，耕钓混樵渔。

忽扁舟，凌骇浪，到三吴。纶巾羽扇容与，

— 员 —



争看列仙儒。不为莼鲈笠泽，便挂衣冠神武，
此兴渺江湖。举酒对明月，高曳九霞裾。

又

凯歌上刘恭父

猩鬼啸篁竹，玉帐夜分弓。少年荆楚剑客，
突骑锦檐红。千里风飞雷厉，四棱星流彗扫，萧
斧剉春葱。谈笑青油幕，日奏捷书同。


诗书帅，黄阁老，黑头公。家传鸿宝秘略，
小试不言功。闻道玺书频下，看即沙堤归去，
帷幄且从容。君王自神武，一举朔庭空。

又 泛湘江

濯足夜滩急，晞发北风凉。吴山楚泽行遍，
只欠到潇湘。买得扁舟归去，此事天公付我，
六月下沧浪。蝉蜕尘埃外，蝶梦水云乡。

制荷衣，纫兰佩，把琼芳。湘妃起舞一笑，
抚瑟奏清商。唤起九歌忠愤，拂拭三闾文字，
还与日争光。莫遣儿辈觉，此乐未渠央。

— 圆 —



又 金山观月

江山自雄丽，风露与高寒。寄声月姊，借我玉鉴此中看。幽壑鱼龙悲啸，倒影星辰摇动，海气夜漫漫。涌起白银阙，危驻紫金山。

表独立，飞霞佩，切云冠。漱冰濯雪，眇视万里一毫端。回首三山何处，闻道群仙笑我，要我欲俱还。挥手从此去，翳凤更骖鸾。

又 汪德邵无尽藏


淮楚襟带地，云梦泽南州，沧江翠壁佳处，突兀起红楼。凭仗使君胸次，与问老仙何在，长啸俯清秋。试遣吹箫看，骑鹤恐来游。

欲乘风，凌万顷，泛扁舟。山高月小，霜露既降，凜凜不能留。一吊周郎羽扇，尚想曹公横槊，兴废两悠悠。此意无尽藏，分付水东流。

又 隐静山观雨

青嶂度云气，幽壑舞回风。山神助我奇观，

— 猿 —



唤起碧霄龙。电掣金蛇千丈，雷震灵龟万叠，
汹汹欲崩空。尽泻银潢水，倾入宝莲宫。

坐中客，凌积翠，看奔洪。人间应失匕筋，
此地独从容。洗了从来尘垢，润及无边焦槁，
造物不言功。天宇忽开霁，日在五云东。

又 桂林集句

五岭皆炎热，宜人独桂林，江南驿使未到，
梅蕊破春心。繁会九衢三市，缥缈层楼杰观，
雪片一冬深。自是清凉国，莫遣瘴烟侵。


江山好，青罗带，碧玉簪。平沙细浪欲尽，
陡起忽千寻。家种黄柑丹荔，户拾明珠翠羽，
箫鼓夜沈沈。莫问骖鸾事，有酒且频斟。

又 桂林中秋

今夕复何夕，此地过中秋。尝心亭上唤客，
追忆去年游。千里江山如画，万井笙歌不夜，
扶路看遨头。玉界拥银阙，珠箔卷琼钩。

驭风去，忽吹到，岭边州。去年明月依旧，
还照我登楼。楼下水明沙静，楼外参横斗转，

— 源 —



搔首思悠悠。老子兴不浅，聊复此淹留。

又 和庞佑父

雪洗虏尘静，风约楚云留。何人为写悲壮，
吹角古城楼。湖海平生豪气，关塞如今风景，
剪烛看吴钩。剩喜然犀处，骇浪与天浮。

忆当年，周与谢，富春秋，小乔初嫁，香
囊未解，勋业故优游。赤壁矶头落照，肥水桥
边衰草，渺渺唤人愁。我欲乘风去，击楫誓中
流。


又

为时传之寿

云海漾空阔，风露凜高寒。仙翁鹤驾，羽
节缥缈下天端。指点虚无征路，时见双凫飞舞，
挥朱隘尘寰。吹笛向何处，海上有三山。

彩衣新，鱼服丽，更朱颜。蟠桃未熟，千
岁容与且人间。早晚金泥封诏，归侍玉皇香案，
踵武列仙班。玉骨自难老，未用九霞丹。

— 缘 —



水调歌头

为方务德侍郎寿

紫橐论思旧，碧落拜除新。内家敕使，传诏亲付玉麒麟。千里江山增丽，是处旌旗改色，佳气郁轮囷。看取连宵雪，借与万家春。

建崇牙，开盛府，是生辰。十州老稚，都向今日祝松椿。多少活人阴德，合享无边长算，惟有我知君。来岁更今日，一气转洪钧。

又

垂虹亭

舫棹太湖岸，天与水相连。垂虹亭上，五年不到故依然。洗我征尘三斗，快揖商飚千里，鸥鹭亦翩翩。身在水晶阙，真作驭风仙。


望中秋，无五日，月还圆。倚栏清啸孤发，惊起壑龙眠。欲酹鸱夷西子，未办当年功业，空击五湖船。不用知余事，莼鲈正芳鲜。

又

送刘恭父趋朝

鳌禁辍颇牧，熊轼赖龚黄。一时林莽千险，

— 远 —



蜂午要驱攘。金版六韬初试，烟敛山空野迥，
低草见牛羊。旒纛释南顾，戈甲濯银潢。

玉书下，褒懿绩，促曹装。帝宸天近，红旆东去带朝阳。归辅五云丹陛，回首楚楼千里，遗爱满潇湘。应记依刘客，曾此奉离觞。

多丽


景萧疏，楚江那更高秋。远连天、茫茫都是，败芦枯蓼汀洲。认炊烟、几家蜗舍，映夕照、一簇渔舟。去国虽遥，宁亲渐近，数峰青处是吾州。便乘取、波平风静，荃棹且夷犹。关情有，冥冥去雁，拍拍轻鸥。

忽追思、当年往事，惹起无限羁愁。挂笏朝来多爽气，秉烛夜永足清游。翠袖香寒，朱弦韵悄，无情江水只东流。柂楼晚，清商哀怨，还听隔船讴。无言久，余霞散绮，烟际帆收。

木兰花慢

送归云去雁，淡寒采、满溪楼。正佩解湘腰，钗孤楚鬓，鸾鉴分收。凝情望行处路，但

— 苑 —



疏烟远树织离忧。只有楼前溪水，伴人清泪长流。

霜华夜永逼衾裯。唤谁护衣篝。念粉馆重来，芳尘未扫，争见嬉游。情知闷来殢酒，奈回肠、不醉只添愁。脉脉无言竟日，断魂双鹜南州。

又

紫箫吹散后，恨燕子、只空楼。念璧月长亏，玉簪中断，覆水难收。青鸾送碧云句，道霞扃雾锁不堪忧。情与文梭共织，怨随宫叶同流。


人间天上两悠悠。暗泪洒灯篝。记谷口园林，当时驿舍，梦里曾游。银屏低闻笑语，但醉时冉冉醒时愁。拟把菱花一半，试寻高价皇州。

水龙吟

望九华山作

竹舆晓入青阳，细风凉月天如洗。峰回路转，云舒霞卷，了非人世。转就丹砂，铸成金

— 愿 —



鼎，碧光相倚。料天关虎守，箕畴龙负，开神秘、留兹地。

缥缈珠幢羽卫。望蓬莱、初无弱水。仙人拍手，山头笑我，尘埃满袂。春锁瑶房，雾迷芝圃，昔游都记。怅世缘未了，匆匆又去，空凝伫、烟霄里。

又


平生只说浯溪，斜阳唤我归船系。月华未吐，波光不动，新凉如水。长啸一声，山鸣谷应，栖禽惊起。问元颜去后，水流花谢，当年事、凭谁记。

须信两翁不死。驾飞车、时游兹地。漫郎宅里，中兴碑下，应留屐齿。酌我清尊，洗公孤愤，来同一醉。待相将把袂，清都归路，骑鹤去、三千岁。

念奴娇 过洞庭

洞庭青草，近中秋、更无一点风色。玉鉴琼田三万顷，著我扁舟一叶。素月分辉，明河

— 怨 —



共影，表里俱澄澈。悠然心会，妙处难与君说。

应念岭海经年，孤光自照，肝肺皆冰雪。短发萧骚襟袖冷，稳泛沧浪空阔。尽吸西江，细斟北斗，万象为宾客。扣舷独笑，不知今夕何夕。

又 张仲钦提刑行边

弓刀陌上，净蛮烟瘴雨，朔云边雪。幕府横驱三万里，一把平安遥接。方丈三韩，西山八诏，慕义羞椎结。梯航入贡，路经头痛身热。


今代文武通人，青霄不上，却把南州节。虏马秋肥雕力健，应看名王宵猎。壮士长歌，故人一笑，趁得梅花月。王春奏计，便须平步清切。

又 欲雪呈朱漕元顺

朔风吹雨，送凄凉天气，垂垂欲雪。万里南荒云雾满，弱水蓬莱相接。冻合龙冈，寒侵铜柱，碧海冰渐结。凭高一笑，问君何处炎热。

家在楚尾吴头，归期犹未，对此惊时节。

— 四 —



忆得年时貂帽暖，铁马千群观猎。狐兔成车，
笙歌震地，归踏层城月。持杯且醉，不须北望
凄切。

又 再和

绣衣使者，度郢中绝唱，《阳春白雪》。人
物应须天上去，一日君恩三接。粉省香浓，宫
床锦重，更把丝绦结。臣心如水，不教炙手成
热。


还记岭海相从，长松千丈，映我秋竿节。
忍冻推敲清兴满，风里乌巾猎猎。只要东归，
归心入梦，梦泛寒江月。不因莼鲈，白头亲望
真切。

又

星沙初下，望重湖远水，长云漠漠。一叶
扁舟谁念我，今日天涯飘泊。平楚南来，大江
东去，处处风波恶。吴中何地，满怀俱是离索。

常记送我行时，绿波亭上，泣透青罗薄。
檣燕低飞人去后，依旧湘城帘幕。不尽山川，

— 赧 —



无穷烟浪，幸负秦楼约。渔歌声断，为君双泪倾落。

雨中花慢

一叶凌波，十里驭风，烟鬟雾鬓萧萧。认得兰皋琼佩，水馆冰绡。秋霁明霞乍吐，曙凉宿霭初消。恨微颦不语，少进还收，伫立超遥。

神交冉冉，愁思盈盈，断魂欲遣谁招。犹自待、青鸾传信，乌鹊成桥。怅望胎仙琴叠，忍看翡翠兰苕。梦回人远，红云一片，天际笙箫。

二郎神 七夕

坐中客。共千里、潇湘秋色。渐万宝西成农事了，穠穠看、黄云阡陌。乔□橘洲风浪稳，岳镇耸、倚天青壁。追前事、与亡相续，空与山川陈迹。

南国。都会繁盛，依然似昔。聚翠羽明珠三市满，楼观涌、参差金碧。乞巧处、家家追乐事，争要做、丰年七夕。愿明年强健，百姓欢娱，还如今日。

— 圖 —



满江红

秋满蘅皋，烟芜外、吴山历历。风乍起、兰舟不住，浪花摇碧。离岸橹声惊渐远，盈襟泪颗凄犹滴。问此情、能有几人知，新相识。

追往事，欢连夕。经旧馆，人非昔。把轻颦浅笑，细思重忆。红叶题诗谁与寄，青楼薄倖空遗迹。但长洲、茂苑草萋萋，愁如织。

又 于湖怀古


千古凄凉，兴亡事、但悲陈迹。凝望眼、吴波不动，楚山丛碧。巴滇绿骏追风远，武昌云旆连江赤。笑老奸、遗臭到如今，留空壁。

边书静，烽烟息。通轺传，销锋镝。仰太平天子，坐收长策。蹙踏扬州开帝里，渡江天马龙为匹。看东南、佳气郁葱葱，传千亿。

蝶恋花 行湘阴

漠漠飞来双属玉。一片秋光，染就潇湘绿。

— 猿 —



雪转寒芦花蔌。晚风细起波纹縠。

落日闲云归意促。小倚蓬窗，写作思家曲。
过尽碧湾三十六。扁舟只在滩头宿。

又 怀于湖

恰则杏花红一树。捻指来时，结子青无数。
漠漠春阴缠柳絮。一天风雨将春去。

春到家山须小住。芍药樱桃，更是寻芳处。
绕院碧莲三百亩。留春伴我春应许。

又 送刘恭父


画戟游闲刀入鞘。安石榴花，影落红栏小。
似劝先生须饮釂。枕中鸿宝微传妙。

袞袞锋车还急诏。满眼潇湘，总是恩波渺。
归去槐庭思楚峤。觚棱月晓期分照。

又 送姚主管横州

君泛仙槎银海去。后日相思，地角天涯路。
草草杯盘深夜语。冥冥四月黄梅雨。

— 源 —



莫拾明珠并翠羽。但使邦人，爱我如慈母。
待得政成民按堵。朝天衣袂翩翩举。

鹧鸪天 上元设醮

咏彻琼章夜向阑。天移星斗下人间。九光
倒影腾青简，一气回春绕绛坛。

瞻北阙，祝南山。遥知仙仗簇清班。何人
曾侍传柑宴，翡翠帘开识圣颜。

又

子夜封章扣紫清。五霞光里佩环声。驿传
风火龙鸾舞，步入烟霄孔翠迎。

瑶简重，羽衣轻。金童双引到通明。三湘
五筦同民乐，万岁千秋与帝龄。

又

忆昔追游翰墨场。武夷仙伯较文章。琅函
奏号银台省，毡笔书名御苑墙。

经十载，过三湘。横楣丽锦照传觞。醉余

— 鵲 —

